

讀
春
秋
存
稿

讀春秋存稿卷三目次

夏羿事辨

屠岸賈事辨

祧辨

大夫祭用太牢辨

大夫無主辨

閏月辨

一事兩收辨

享饗字辨

鵠鵠字辨

分經合傳考

九合考

東周考

爾雅訂誤

爾雅訂誤二

夏羿事辨

自太史公不能言少康中興事而說尙書者輾轉支離遂視仲康如春秋之衛公孫剌楚公子比是亂道也予旣嘗于書考言之蓋其蔽由于明有左氏之傳杜君之注而莫知參證以求其中茲復于讀春秋申之案傳昔有夏之方衰也后羿自鉏遷于窮石因夏民以代夏政因夏民者卽書所謂因民弗忍也魏絳本述夏訓此約其文也代夏政卽距于河事羿旣距太康卽已踞夏都而王故言代下所云帝夷羿是也

注禹孫太康淫放失國夏人立其弟仲康仲康亦微
弱仲康卒子相立羿遂代相號曰有窮杜氏未見古
文尙書及孔傳未知太康失國卽由羿距于河故以
代夏爲代相然云夏人立仲康遠勝安國羿廢太康
而立仲康之說夏人者河南之諸侯也斟灌斟尋有
鬲有虞之倫也蓋太康旣失故都河北盡陷僅得僑
國河南金履祥陳仁錫之史所謂崩于陽夏者是也
其傳仲及相皆出河南諸侯之推戴與羿儼分南北
畧如周之居洛後世東晉南宋之事及相滅而天下

混并于有窮。夏統中絕。且四十年。以有少康之興。則在伍員語中。孔疏雖不免爲安國所縛。而云羿自立爲天子。則亦與在帝夷羿之文合。又云相依斟灌斟尋。夏祚未滅。與羿並稱王。其說顯有出入。仲康之非爲羿立。益明矣。言夏事者。亦以此傳及注爲正也。可而何蘇氏林氏蔡氏錢氏之說。徒爲二孔牽鼻。此予所不能闕如者也。鉏窮石。注失詳所在。蓋羿事固可畧之。然有關經義得失。則亦未可以無辨。金氏前編注。鉏在今澶州衛南縣。卽元和郡縣志。故鉏城在滑。

州衛南縣東十五里左氏后羿本國者而窮石仍云
不知所在考朱子注騷經夕歸伏于窮石兮云窮石
山名在張掖后羿之國四書釋地辨之曰是時夏都
安邑鉏城去夏都僅千里計窮石必更近于安邑故
得因夏民以代夏政若如朱子注在張掖則去夏都
三千里遠在西北天一隅縱恃其射豈能及夏朱子
蓋見王逸引淮南言弱水出于窮石入于流沙遂傳
會此窮石卽后羿所遷不知當別有窮石爲國名者
但不可考耳案此辨甚當予更謂古之遷都皆非相

去絕遠。商都五遷。雖南北時異。不離于河。至若諸侯
列土。各有分限。尤無可越國以鄙遠之理。故公劉自
狄遷豳。太王去邠。遷岐。文武遷豐及鎬。春秋而邢遷
夷儀。衛遷帝邱。皆不出其封內。若滑州。卽今滑縣。至
張掖。遼絕不止三千里。后羿何由得遷之。朱子豈以
元和志未足信。而鉏地又別有攷耶。金氏之不考。從
朱子。毋亦有見于其不安。故寧闕所疑耶。則又于是
歎杜氏之慎也。

屠岸賈事辨

甚哉傳聞之惑人也。春秋無屠岸賈滅趙事。而太史公鑿鑿言之。其稱程嬰公孫杵曰。義甚高。以愚質諸內外傳。乃事之所必無者。王伯厚嘗据孔氏正義及呂成公說。以明其誤。洪容齋亦云然。皆特以理斷之。正義曰。時晉君明。諸臣強。不容有屠岸賈輒廁其間。如此專恣。而于當日事實。猶未盡也。案傳。晉趙嬰通于趙莊姬。原屏放諸齊。嬰曰。我在。故欒氏不作。我亡。吾二昆其憂哉。此景公十四年事。在魯成五年。至成八年。經書晉殺其大夫趙同趙

括傳云趙莊姬爲趙嬰之亡故譖之于晉侯曰原屏將爲亂樂卻爲徵六月晉討趙同趙括武從姬氏畜于公宮此景十七年事蓋難之作也實厲階于姬成于樂卻故成十七年傳韓厥曰昔吾畜于趙氏孟姬之讒吾能違兵國語段規亦稱趙有孟姬之讒而襄二十三年傳趙氏以原屏之難怨樂氏當日後先紀述歷歷如是絕不聞一及屠岸也是時誅者唯同括經傳皆不言有趙朔蓋朔已前死

宣十二年趙朔將下軍樂書佐之成

二年樂書將下

軍注代趙朔嬰齊又已放外豈得四人並誅而成

十三年傳猶稱趙旃將新軍趙族何嘗盡滅且使其
事爲討靈公之賊則旃正趙穿子何以反得獨免韓
厥言于晉侯何尙得援宣孟之忠而立武也武從姬
氏壽于公宮則是武生已久縱爲朔之遺腹亦非生
于同括誅後況國語趙文子冠見欒武子諸人其時
三郤猶在三郤之滅事在成十七年去同括後纔十
一年則武之冠去被難時至多不過十年安得有程
嬰與俱匿山中居十五年始出之事哉冠而見諸大
夫則是武蚤立矣立武事傳卽繫于討同括下蓋終

言之固非卽在本年。然考晉景卒于成之十年卽討同括後二年。其夢大厲曰殺余孫不義。此于史記大業爲祟之文差合。蓋同括雖不令然死非當罪。又與盾後無涉。或韓厥因是時乘機言之而反趙田歟。然史記乃以同括事屬之景三年。則爲魯宣十二年。于是云居十五年。景公疾乃與韓厥謀立趙孤。又云趙氏復位十一年而晉厲公殺三卻。年數事本全與經傳乖悖。諸家議之良然。余故瑣悉辨之以爲所必無者。不寧惟是卽賈也。嬰也。杵臼也。亦未必實有其人。

何則。晉作六軍。其將皆卿也。賈既位司寇。且能擅兵權。役諸將如此。豈繫無一軍之任。而傳自晉文襄以下。諸卿之先後嬪爲執政佐軍者。名族皆班班可攷。寧獨遺賈。傳又善敘義烈。二士之功。趙其尤大于提彌明。董安于之倫矣。寧獨遺之。故曰。事之徵信。史不足據。特戰國任俠好奇者爲之。非其實也。

此癸酉夏病中書趙世家後者。時方分習國書。因蒙特甚。恒藉史漢爲游息。隨筆存記之作頗多。

其後益專意于經前稿遂漸散棄尙存此以其有
昇春秋說也附錄入焉

丁未自記

祧辨

魯襄公冠于衛成公之廟。季武子之對晉侯曰：君冠以先君之祧處之。注：諸侯以始祖之廟爲祧。案祧超也。廟之次序當遷者也。已遷曰毀廟，未遷曰祧廟。始祖太祖百世不遷，何以云祧？下何以冠于成公之廟？成公豈衛始祖乎？疏引祭法：遠廟爲祧。天子有二祧。鄭注云：諸侯無祧，故謂始祖廟。不思傳明言先君之祧，何云無祧？昭八年傳稱豐氏之祧，大夫有祧，何況諸侯？蓋祭法遠廟爲祧者，統天子諸侯大夫而言之。

也。天子有二祧，別乎諸侯大夫而言也。武王克商，增立二祧于亞圉之上，是也。天子三昭三穆，二昭二穆，爲四親廟，一昭一穆爲祧。諸侯二昭二穆，一昭一穆，爲親廟，一昭一穆爲祧。大夫一昭一穆，穆爲親，昭爲祧。親廟未可遷，由親而漸升之。其世卽遠，則彌尊，故言祧是尊之意也。鄭所謂超上去意也。衛成公爲獻公曾祖，卽是衛祧廟之一，故冠于其廟。如魯之祧，假使在魯，則當于文公或僖公廟可知。故服虔云：祧，謂曾祖之廟，是而疏駁之，非也。

大夫祭用太牢辨

禮器云君子太牢而祭謂之禮匹士太牢而祭謂之攘鄭注君子自大夫以上雜記云大夫之虞也少牢卒哭成事祔皆太牢此非先王之禮也禮莫重于祭其品節度數至嚴自天子諸侯至大夫士所應祭之神與宗廟之制等殺具有明文必無太牢一事大夫獨得與天子諸侯同之理禮記出漢儒雜採其言多出於周秦問人當古禮亡失時多變禮之後習非成是而遂錄之不盡可深信鄭氏孔氏復不能詳考其

同異得矣。以廣折中。其相矛盾。愈多而愈惑。今卽以王制言。天子社稷皆太牢。諸侯社稷皆少牢。大夫士宗廟之祭。有田則祭。無田則薦。諸侯祭社稷。尙不得與天子同太牢。大夫尙不得祭社稷。豈反得用太牢于宗廟之祭。又言。諸侯無故不殺牛。大夫無故不殺羊。士無故不殺犬豕。故者。謂祭與饗賓也。是大夫祭唯得用羊豕。無用牛之時。益明矣。王制禮器雜記。同爲禮經。而其言互異如此。學者固不可不分別裁之者也。孔氏之爲左傳疏。乃于襄二十二年。鄭公孫黑

肱使黜官薄祭。祭以特羊。殷以少牢。旣知少牢饋食禮。爲諸侯之大夫時祭之禮。又並引禮器雜記之文。以爲大夫得用太牢。又似知其不安。而以禮器之文。據天子大夫雜記據喪祭進用一等。士喪禮。士遣奠。用少牢。是也。是皆孔疏之妄說。而曲者也。案天子卿大夫受地視侯伯。或得用太牢。顧已非諸侯之大夫。可援爲例矣。父爲大夫。子爲士。葬以大夫。祭以士。是卽父子繼爲大夫。亦唯祭以大夫。何得進用一等。士喪禮之有少牢。亦士之僭而變禮耳。蓋時至春秋。諸

侯僭天子大夫僭諸侯士僭大夫大夫甚至僭天子
鄭子張亦習焉而知其不安是以使黜官薄祭戒子
孫以反于正黜官者省冗置也是時大夫官屬多有
非所置而置如管仲官事不攝者矣薄祭云者大夫
之祭唯當以特羊以少牢耳是時方歌雍舞八佾無
不太牢而祭者矣俗以侈爲厚則此以正爲薄也若
大夫果得用太牢謂之禮則先王之制不敢過亦不
敢不及于張何取特薄之而君子猶善之乎足知其
爲由僭而求反正也故其言曰生于亂世貴而能貧

民無求焉。可以後亡。敬其事。君與二三子生在敬戒。不在富也。是則古今居官者。皆當書諸紳者也。然而殷者。禘祫也。禮。大夫無禘祫。子張知太牢之非。而猶不免言殷。豈非禮失之甚。雖有志者。亦有不能一舉而盡反者歟。孔氏則既知大夫無禘祫。又泥于傳之言殷。援禮記言。大夫有善于君。祫及五世。並採劉炫云。禮。大夫時祭少牢。大祭太牢。黑肱全滅之。謙也。是爲經義之害。故不可以不辨。

大夫無主辨

哀十六年。衛孔惺出奔宋。使貳車反祔于西圃。注。祔。藏主石函。此與莊十四年。鄭原繁言先君桓公。命我先人典司宗祔。注。祔。廟中藏主石室。無以異也。蓋諸侯大夫並得有主。明矣。疏。則以少牢饋食。大夫之祭禮。其祭無主。援鄭氏祭法注。唯天子諸侯禘祫有主。大夫不禘祫。無主。以斷孔惺得有主者。當時僭爲之。非禮也。其于祭法疏。亦及孔惺事。以大夫無主。出許慎五經異義。公羊說。然公羊固無明文。質諸禮經。大

夫之有主無主。又全無文。以理度之。大夫士皆得有廟。喪則設重。葬則虞祔。祭則用尸。事事不嫌與諸侯同。特有降殺而已。何獨至于主而嫌之。儀禮之不言主。蓋文有不備耳。非無主也。主以棲神。故祔而作主。無主。則神于何託。何所奉以升祔。今如許鄭之說。以制幣招其神而藏焉。士則結茅用菽。幣與茅豈可刻而書之。又豈可久之物哉。而杜注于君薨祔而作主。特祀于主。猶謂其不通于卿大夫。傳自爲君言。不及卿大夫耳。何不通之有也。是以徐氏讀禮通考。備載

徐邈及清河王懌說皆辨許鄭之非卽援孔悝事爲證春秋大夫之僭禮多矣獨此殊未見實然後世自天子至于庶人死無不有主久爲禮俗通行卽使古禮果有不同已不必是古而非今矣何況本無不同者但懌又傳會公羊大夫聞君之喪攝主而往爲證則誤攝主乃謂主祭非神主之主何注云使兄弟若宗人攝行主事不廢祭古禮也于義初無不安懌則以攝爲收斂謂斂主罷祭過矣徐氏之取邈懌亦未暇細加審別也

閏月辨

文公元年傳。於是閏三月。非禮也。先王之正時也。履端于始。舉正于中。歸餘于終。云云。注以爲於法。閏當在僖末年。誤在今年三月。是嫌置閏失近後也。疏據漢志。以文元年。距僖五年正月辛亥朔旦冬至。二十九歲。是歲閏餘十三。閏當在十一月後。而在三月。故曰非禮。是嫌置閏失近前也。二說不同。要爲魯人以亡閏而置閏。則一。蓋古人推步。常以夏正十一月。周之正月朔旦冬至爲章首。十九歲爲一章。所謂履端

于始也。凡月必以中氣爲準。漢志所謂節不必在其
月中。中氣必在正數之月。故閏月之前。中氣在晦。閏之
後。月中氣在朔。所謂舉正于中也。古稱閏月而不繫
月數者。亦以其無中氣也。于一歲之終。計其餘分。得
幾日。積而筭之。至三歲未盈。得一月之日。則置閏。所
謂歸餘于終也。其置閏無定月。而有定日。要視節氣
以爲差。自古及今。疎密雖有不同。于理則一而已矣。
而何顧氏曰。知錄誤解傳文。忽言古人以閏爲歲之
餘。凡置閏。必在十二月之後。故曰歸餘于終。又言經

文之書閏月皆在歲末。文六年閏月不告朔。哀五年閏月葬齊景公而傳。成十七年。襄九年。哀十五年。皆有閏月。亦並在歲末。經傳之文。凡閏不言其月者。言閏卽歲之終。可知也。今魯改其法。置閏在三月。故爲非禮。顧氏讀書強博。世多信之。此說則其似新闢而最紕繆者。不可以不辨。案堯典以閏月定四時成歲。則閏卽在四時之中。隨時而間置之。明矣。古法並非有異于今。但不若今人稱閏幾月耳。若閏必歲終。則四時全舛。無是理也。顧氏何不審思。春秋經傳之書

月皆周正。周十二月。乃夏正十月。非歲終也。若以夏十二月言。又與經傳不合矣。若以周人自置閏在周正十二月後。則商人當置在商正十二月後。而置閏且隨正朔並改矣。豈有如此紛錯之理。然觀漢志之載伊訓。商十二月乙丑朔旦冬至。此商正十二月。夏之十一月也。冬至在月朔。卽是前有閏月。而閏自在十月。非歲終也。又載武成。惟一月壬辰云云。是歲也。閏數餘十八。正大寒中。在周二月己丑晦。明日閏月庚寅朔。先儒考武成月日者。多據之。是閏在二月。周

二月夏之十二月。可以言歲終。而非春秋經傳之歲終也。志惟自周公攝政五年正月丁巳朔旦冬至。以下遞推。至于僖公五年正月辛亥朔旦冬至。以迄周末。屢有正月朔旦冬至之文。可以爲周閏在十二月後之証。然亦七八十年而一遇。安得凡閏必在十二月也。且文六年之閏月。志固謂魯亡閏而置閏。經傳皆紀在十一月下。哀五年之閏月。疏亦言閏十一月。並未見必是十二月。至昭二十年傳。二月己丑日南至。志及注。並謂魯失閏。其閏月乃在八月下。此正當

于上年十二月後置閏而反失之者杜孔所推前後失誤尤非一端然則魯法之疎亦甚矣今就顧說核之魯于是時既改古法置閏在三月何得以後閏月仍皆歲末蓋古人閏月罕舉大事故經傳之書閏恒稀而一二偶及又適在歲末其間多有非所置而置疏所謂或先或後不與常同並載釋例謂其始失于毫毛尙未可覺歷而成多以失弦望晦朔不得不改憲以順之者也遂至說者輕于立論謬爲得間亦不揆于理不考其實而爲之耳夫推步之法古疎而今

密。然如顧氏此說。則又誣古太深。令古誠如是。其爲
乖迂。必有至于春秋易位。不止如左氏所譏者。又使
古誠有是。千百年儒者。豈無考于天時人事而言之。
何待于今。乃今之爲注疏考證者。猶採其說。且以爲
推步之密。魯實始基之。左氏第以非周制。而謂爲非
禮。不更惑之甚乎。

一事兩收辨

左傳有兩事而前後相類如一事者。昭十二年鄭簡公卒將爲葬除及游氏之廟將毀焉。子太叔使其除。徒執用以立而毋庸毀。曰子產過女而問何故不毀。乃曰不忍廟也。諾將毀矣。旣如是。子產乃使辟之。十八年簡兵大蒐將爲蒐除。子太叔之廟在道南。其寢在道北。其庭小。過期二日。使除徒陳于道南。廟北曰子產過女而命速除。乃毀于南鄉。子產朝過而怒之。除者南毀。子產及衢使從者止之。曰毀于北方。此本

兩事一以葬一以蒐皆及游氏之廟一全不毀一則毀于北疏謂游吉宅近大路故數將徹毀也語甚明析並無重複之疑蓋游吉兩用斯術以免其廟故前後適同而他人之不獲免者可知矣傳特備紀之以見意曰知錄乃以爲一事兩存而失刪其一非也又有一事而前後分紀爲兩事者昭三十二年冬十一月晉魏舒韓不信如京師合諸侯之大夫于狄泉尋盟且令城成周魏子南面衛彪侯曰魏子必有大咎干位以令大事非其任也已丑士彌牟營成周云云

以令役于諸侯。屬役賦丈書以授帥。而效諸劉子。定
元年春王正月。晉魏舒合諸侯之大夫于狄泉。將以
城成周。魏子蒞政。衛彪傒曰。將建天子而易位。以令
非義也。孟懿子會城成周。庚寅。裁宋仲幾不受功。此
本城成周一事。自分前後。前尋盟。後不盟。前魏子南
面。是僭君位。後蒞政。是侵天子大夫之政。卽前所效
諸劉子者。注疏皆甚分明。並非重出。日知錄則又以
爲一事兩收。而失刪其一。晉之十一月。周之正月也。
庚寅卽己丑之明日。分爲兩年也。此說尤非案。春秋

唯晉多用夏正。左氏據晉史述晉事。日月先後。往往與經不合。杜注槩以從赴言之。然亦第傳與經互異而已。未有傳與傳又自相岐者。此會城成周。經書在冬。本不言月。傳既言十一月。曾于前。而又言正月。城于後。若只一事。何敢兩端。蓋己丑乃上年十一月之口。庚寅乃今年正月之日。相距六十日。甲子一轉矣。前合諸侯。專爲集議徵役。後合諸侯。方是率作興事。前之己丑。分派已定。使各知地段人數。歸而各具其財。用徒役。以至始于後之庚寅。裁耳。讀前傳屬役賦。

丈及後傳孟懿子會城成周句下疏自明安得視爲一兩日間。前一日方屬役賦丈而次日卽能栽之理乎。魏舒以正月辛巳合諸侯已乃去田大陸。至庚寅栽相距十日而舒已死。范鞅代之故宋仲幾不受功。士彌牟曰晉之從政者新子姑受功意正以屬役賦丈書以授帥乃上冬魏舒所定仲幾于時旣無異詞不應于舒死後忽欲易之非新執政所與聞也。若庚寅卽上傳已丑之次日則已丑之日魏舒方存中間更無別日以爲其田于大陸還卒于甯之地此皆推

按傳文前後而可得之者顧氏全失事理遂若左氏
亦如後代史書之可刪併蓋日知錄之說可存者不
少應辨者亦多矣

享饗字辨

昭公五年傳享覲有璋注享饗也案古享與饗異禮二字亦異用後世始通假爲一故今經書于此二字多混杜氏誤訓享獻之享爲饗食之饗孔疏知其非而不敢正享禮小饗禮大享由賓饗由主此享與覲連文又言璋自是賓之享非主之享若主國饗賓在賓旣聘行享禮後賓復安用執璋乎下文設机而不倚二句方是饗禮宴有好貨又在饗禮後日

鵠鵠字辨

十七年祝鵠氏注祝鵠鵠鵠也案此注大謬蓋杜本是鵠鵠也卽詩之翩翩者雛爾雅之佳其夫不者本當作佳而詩作鳥旁佳杜作佳旁鳥卽爾雅釋文佳如字或旁加鳥非者也鵠並無鵠名釋爾雅者衆家皆所不言自杜本傳寫訛鵠字爲鵠鵠之鵠宋人校釋文不加察遂妄改其鵠音佳本作佳本或作鵠之文皆加四點于其下而別爲子遙子堯二反以補之極可嗤笑當孔氏作疏時杜本蓋尙作鵠或止作佳

言言不刊 卷三
未誤故孔無別解。所述詩爾雅說皆相從順。今乃輒
轉仍訛。至并疏所謂毛傳云。雛夫不也者。亦作鷓鴣
之鷓。毛傳則安得有是哉。是其謬之易見者。而今之
監本亦失考證也。

分經合傳考

襄公二十六年經文之前各本俱有會于夷儀之歲至成而不結一段傳文不與上下年傳接別加傳字如惠公元妃孟子云云例注云傳爲後年修成起本當繼前年之末而特跳此者傳寫失之今之監本始刊附于三十六卷二十五年之末從注也仍別起行存舊本也案先儒之說多以左氏原本經自經傳自傳杜氏始分經以合傳逐年以比事于是經傳牽綴而爲一實使經與經傳與傳反離析而爲二其弊蓋

與今本周易同。予惟古本經傳既各成篇帙，則當杜氏未合之先，兩不相比。而自相聯屬，此傳自爲二十六年春秦伯之弟鍼如晉修成云云，上半截正文，不必繼前年之末。本無特跳之失也。其特跳者，亦由分合之初，拘于每年必提年頭爲起句，往往割其上半截之在年上。本相屬者，如惠公元妃孟子云云，卽是隱公元年正傳。獨越置經前，謂之先經，以起事。其他則皆移附前年之末，又爲之注曰：爲明年某事起。或言張本，而此傳則其偶失附前年者。後人傳寫，覺其

不合。遂致別在經上耳。然觀此注云云。則似其所據之本。傳與經已多相牽綴。故得于此言特跳言傳寫征南蓋第因而不改。其序所稱分經之年。與傳之年相附比。其義類當必有先征南而爲之者。亦如今本周易之不始于王弼歟。漢書初左氏傳多古字古言。學者傳訓詁而已。及劉歆治左氏。引傳文以釋經。經傳相發明。由是章句義理備焉。是其崖畧也。

九合考

僖二十七年同盟于幽。穀梁傳同尊周也。于是而後授之諸侯。齊侯得衆也。桓會不致安之也。桓盟不日信之也。信其信仁其仁。衣裳之會十有一。未嘗有歃血之盟也。信厚也。兵車之會四。未嘗有大戰也。愛民也。極贊桓德。注亦明備足爲論語九合諸侯不以兵車正註。蓋桓之合諸侯。初不止于九。故朱子據左傳展喜言桓公是以糾合諸侯。而謀其不協。讀九卽糾字。自鄭氏作穀梁起廢以來。泥于九合之文。鄭注論

語以莊十三年會柯十四年會鄆十五年會鄆十六年會幽二十七年又會幽僖元年會漚二年會貫五年會首戴七年會甯毋爲九史記則兵車之會三乘車之會六與國語兵車之屬六乘車之會三說旣互歧數亦不備及質之管子書所言九合又各不同而韋昭張守節皆以意去取知非定案自不如范氏注以莊十三年會北杏十四年會鄆十五年又會鄆十六年會幽二十七年又會幽僖元年會漚二年會貫三年會陽穀五年會首戴七年會甯毋九年會葵邱

爲十一會。僖八年會洮。十三年會鹹。十五年會牡邱。十六年會淮。爲四會。此則以兵車會而不用征伐。語致詳析。疏則謂貫與陽穀二會。管仲所不欲。故去之。以當論語九合。又引鄭釋廢疾云。自柯之明年。葵邱以前。去貫與陽穀。固已九合矣。鄭意不數北杏。自外與范注同也。其所載兩或云。尤支離。論語釋文之引范注。于北杏下有又會柯三字。無五年會葵邱五字。蓋所據穀梁注本有誤。柯之盟止齊魯二國。范氏必不數之。而反去葵邱。邢疏之引范注。仍與今本同。其

言不取北杏及陽穀爲九與釋文言鄭同又與楊疏引鄭牴牾均之取義非而據本又多舛也夫九與糾一字之異同而紛紛如彼刻舟求劍之害可勝詰哉

東周考

論語吾其爲東周乎。今之講家爲文者多慢以平王東遷立說。此由朱子集註語稍簡渾。抑未考于春秋傳及古注疏之文而失之也。案公羊昭公二十二年經書劉子單子以王猛入于王城。傳曰王城者何。西周也。二十六年天王入于成周。曰成周者何。東周也。蓋周公營洛邑爲王城。以安宗廟百官所在。爲成周以居殷頑民。其事本具于書洛誥中。呂氏讀書記曰。我乃卜澗水東。瀍水西。惟洛食。先儒以爲今河南城

也。所謂王城也。我又卜瀍水東亦惟洛食。先儒以爲今洛陽也。卽所謂成周也。是也。二者自西都言則統名之東都。自東都言則王城在西。成周在東。漢志成周去王城四十里。是也。謂之王城者。以別乎殷民所居。謂之成周者。取相成之義。若言輔。言陪京也。平王東遷以後。周王皆居王城。而成周如故。亦稱下都。其書于春秋。則統名之京師。是時周自爲周。初無東周之目。見于時所稱者。後世始以別乎西京之周。而言東周。猶之西漢東漢。皆後名之。漢時未有也。唯至敬

王以子朝之亂先與悼王爭立繼與敬王爭立佔居
王城而敬王僅保成周王城在西成周在東於是左
傳有西王東王之語實爲公羊西周東周之目所從
出而何氏注誤以是時王猛自號西周王天下因謂
成周爲東周則王猛無此事蓋或子朝有之亦時人
語云然耳此則東周之名起于當時者敬王既定尋
以王城遭毀遂定居成周劉文公是以有合諸侯城
成周之役矣而時俗之稱未改故孔子得語及之是
故鄭氏古論語注云據時成周蓋亦取諸左氏公羊

而言詩黍離序正義並引而申之以別于平王事云孔子設言之時在敬王居成周之後且意取周公之教頑民故知其爲東周據時成周也古說可考如此但謂取周公之教頑民尙稍回遠蓋是時王室凌夷而至有東周之目微周甚矣以劉子萇叔之忠而人咎其違天夫子蓋心傷焉無日不思得用以維周道不覺其因召我一發之耳據時成周今監本詩疏載注文誤成作東觀疏末二語可見并正于此

爾雅訂誤

古人說一經而能旁推曲喻兼通他經之惑以廣學者之間者莫如孔氏正義故雖有駁雜終以高出諸家茲摘論其一事昭十七年左傳九扈爲九農正注扈有九種也春扈鴈鵠夏扈竊玄秋扈竊藍冬扈竊黃棘扈竊丹行扈喈喈宵扈嘖嘖桑扈竊脂老扈鷦鷯正義曰釋鳥自春扈鴈鵠至宵扈嘖嘖凡七扈其文相次與此注正同釋鳥又云鷦鷯老扈鷦鷯桑扈竊脂注爾雅者舍人李巡孫炎郭璞皆斷老上屬扈下

屬解云。鷦一名鷽老鷽。一名鷽。鷽雀也。唯樊光斷鷽鷽爲句。以老下屬。注云。春秋云。九鷽爲九農正。九鷽者。春鷽夏鷽秋鷽冬鷽。棘鷽行鷽宵鷽桑鷽老鷽。是以老下屬。唯鷽不重耳。李巡云。竊脂一名桑鷽。郭璞曰。俗謂之青雀。青白食肉好盜脂膏。因名云。鄭氏詩箋云。竊脂肉食。陸璣毛詩義疏云。竊脂青雀也。好竊人脯肉及筍中膏。故以名竊脂也。諸儒說竊脂皆謂盜人脂膏也。卽如此言。竊玄竊黃者。豈謂盜竊玄黃乎。爾雅釋獸云。虎竊毛謂之覬。貓鼪如小熊竊毛而

黃竊毛。皆謂淺毛。竊卽古之淺字。但此鳥其色不純。竊玄淺黑也。竊藍淺青也。竊黃淺黃也。竊丹淺赤也。四色皆具。則竊脂爲淺白也。其喈喈嘖嘖。則聲音爲之名矣。其春扈鵪鵉。樊光云。鵪鵉猶分循也。春扈分循五土之宜。乃以人事名焉。其義未必然也。爾雅老扈鵪字不重。賈服皆云鵪鵉。亦聲音爲名也。案此疏明析深足以訂爾雅之誤。蓋郭讀非也。樊光讀是。觀杜注及賈逵皆言老扈鵪鵉。則似其所見爾雅古本如此。原與春扈八句連爲一條。而郭氏所據之本錯。

簡其末一句于前鵓鵒文下。又脫一鵓字。并漏出桑
扈竊脂四字。重見于其下。郭氏諸人。未深考其卽後
春扈條中之文。誤斷老字屬上鵓爲句。又似桑扈之
有二。前之竊脂。解爲盜竊。而後之竊脂。始依類爲淺
字讀之。邢氏疏未敢是正。雖引此疏。而仍從兩解。然
其說勉強矣。予前于詩細言之。茲復備錄之。今爾雅
春扈條。連桑扈句。凡八扈。孔言七。所未詳也。

爾雅訂誤二

經有原文本不誤而其語渾融爲讀者誤會遂以誤解相仍者爾雅釋親云女子同出謂先生爲妯後生爲娣孔疏于成十一年穆姜曰吾不以妾爲妯昭二十八年長叔姒生男皆引之以孫炎云同出謂俱嫁事一夫也事一夫者以已生先後爲娣姒則知娣姒以已之年非夫之年也案此解大誤禮婦人無齒坐以夫之齒安得從已年長幼爲序乎若俱嫁事一夫當論嫡庶之分豈問生年先後乎若二女本娣姒自

有恒稱又何必娣姒乎蓋所謂同出者謂俱嫁在一姓也而其夫兄弟行則以夫之長幼爲序先生後生皆謂夫年非以婦年也穆姜于聲伯母爲姒而云然者以其不聘賤之言吾不與妾爲妯娌也叔向之嫂而稱叔向妻爲姒者乃從諸弟婦稱叔向妻之稱爲稱今世俗往往有之又或相謂姆嫗乃用其子之稱矣孫孔蓋不如杜注昆弟妻相謂爲姒之較渾融也天香樓偶得論此亦泥而支

讀春秋存稿卷三終

讀春秋存稿卷四目次

書楚事例

五戰

附存胡傳舉正序

書楚事例

召陵之盟傳文實是楚子使屈完如師而經文第二云
楚屈完來盟于師盟于召陵不與成二年袁婁之盟
書法同者齊侯使國佐如師敵體之詞也是時齊雖
敗而未服晉亦力未能服齊假魯衛之請而退故下
盟言及有我欲之之意公羊隱元年傳及猶汲汲也
暨猶暨暨也及我欲之暨不
得已此不言使蓋言使則必書楚子是使楚子得敵
也齊侯也故畧之卑楚也言來著楚服也而盟不言及
重言盟于上盟于是楚請盟下盟于則紀其實傳亦

特表言師進師退以見桓之雍容有禮而末結以屈完及諸侯盟則盟之實由楚欲非勉強具見矣是傳之體經也杜注尙未得要領公穀更全失之夫經于楚初則狄之繼僅人之至此方不使楚子得當齊桓而何尊屈完以當齊桓之有又何權在屈完之有哉屈完以楚大夫始見經而得遂書族亦非以其克稱使人正以貴族之來深表楚服之意耳

戰城濮之先傳文實是楚子與諸侯圍宋經則曰楚人陳侯蔡侯鄭伯許男圍宋亦經所以微楚也注乃

以傳言楚子使子玉去宋。經書人者，恥不得志，以微者告，猶序諸侯之上。楚主兵故，引傳申經，皆未得要領，疏似知之，而曲解之。案春秋深抑吳楚，雖進之必以其漸。楚始見經，稱國如狄而已。自荆人來聘而始人之，猶未得以名見也。至召陵而屈完始舉名，始有大夫以表齊桓之功，而併見楚之能服善也。然猶未得以爵通也。至孟之會，而楚子始舉爵，宜申來獻捷，再舉名，君與臣交顯矣。所以醜宋襄之不量力，而致楚得抗衡上國，橫侮中原也。然其餘前後仍皆人之。

至城濮戰敗而後書楚殺其大夫得臣亦以著晉文之伯能使楚自剪其翼也非重得臣也而其後猶皆人之蓋至僖三十二年傳稱楚請平于晉晉報之晉楚始通自是以後經書楚事始與列國不殊至于晉楚之從交相見而褒貶全不殊矣經蓋有大不得已于其間者也然則圍宋之書楚人雖以主兵序諸侯之上實與諸書楚人同爲經之微楚而畧之之詞非必其以微者告也且楚亦未必以微者告觀傳于楚子將圍宋下備載其治兵命將又于前年伐宋直書

宋之叛楚卽晉叛之爲言。楚之詞也。方儼有討罪定伯之意。而肯以微者告哉。至楚子使子玉去宋。雖似見其不能得志于晉。然楚得志。中國之憂也。其不得志。中國之幸也。楚卽恥不得志。而以微者告。經豈肯轉爲楚諱哉。夫楚稱人。而陳蔡鄭許直書爵。吾且見經之爲四國之君。恥其受楚役以圍宋。而豈問楚之恥不得志哉。故其下卽書公會諸侯盟于宋。則是經固明著其爲楚子在焉也。而上書楚人。微楚子也。至書楚人救衛。書及楚人戰于城濮。方是微子玉。夫楚

子且微之。聖經之惡楚而抑之甚矣。無問子玉矣。

卿不會公侯。會則貶之而稱人。示不敵也。故經唯魯卿出會諸侯。得詳名氏。非唯重內。亦魯史不可自稱魯人也。而公與大夫會。則皆人之。或諱不書公。文公及晉處父盟。又以貶而去族。獨成二年。直書公會。楚公子嬰齊于蜀。注不貶嬰齊者。時有蔡許之君。故案是時蔡許之君已失位。爲經所不序。則不得援二君以爲解免矣。此未深揆而強說者也。蓋楚蠻夷也。可以僭王安。知臣不可敵君。若貶嬰齊如晉處父。是待

楚如晉而中國之矣。故直書之以見其不足貶也。唯是魯之恥則深矣。曷以不諱。考傳言楚師侵衛遂侵我及陽橋。孟孫請往賂之。公衡爲質以請盟。楚人許平。其下卽言丙申盟事。無公先會嬰齊之文。蓋當約于請盟許平文中。而侵我及陽橋公衡之質經皆不書。楚至于侵我楚之橫未有甚于此者。魯至行賂與質于楚魯之恥未有甚于此者。諱其甚者不備書而書公會楚公子嬰齊猶有君臣之詞焉。又經之不得已也。至丙申之盟則舉列國之重而皆爲楚役較之

曹南鹿上中國之不競未有甚于此者皆由晉伯衰諸侯貳使然于是槩貶之稱人而公亦無所用諱傳謂之匱盟其卽曹風傷天下之無伯意也夫

經有殊會書雋會王世子尊而殊之也會吳外而殊之也吳之始亦用狄例與楚同焉以中國主之也獨于昭四年書楚靈王會申伐吳二役則自楚子以下連書諸國而淮夷與越皆不殊越以始見經且與徐並稱人若優于吳楚者以楚主之也主乎中國則外乎中國者宜殊之主乎楚則楚也淮夷也越也同類

之適相從者也。無假用殊。胡氏且以連書諸國上從
楚子而下不殊淮夷。見在會之諸侯皆狄。義勝何休
諸家而惜其又以越人之書爲特進而稱人則惑也。
蓋胡氏說經之自亂其例。往往然也。宜其得不償失。
爲讀春秋者所不取矣。

五戰

春秋五大戰傳注及諸家說頗有可參訂者因次而正之以俟折衷

戰于韓杜注闕言韓所在唯後二十四年傳邠晉應韓下云韓國在河東郡界疏無指證以考後漢郡國志馮翊夏陽縣有梁山龍門山劉昭注引詩奕奕梁山又引博物記曰有韓原韓武子采史記正義引括地志韓原在同州韓城縣則韓在河西也今顧氏日知錄獨以傳文涉河侯車敗三敗及韓及韓在涉河

之後則韓當在河東而斷括地志之非于是作注疏
考證者別援郡國志河東河北縣詩魏國有韓亭者
以實之前輩讀書求間不肯苟安異同甚善然竊謂
涉河侯車敗恐只言晉侯之車涉河而敗也蓋秦與
韓皆在河西晉本在河東自平王十四年晉人滅韓
而有其地事見竹書紀年故梁山爲晉望而韓原以食韓武
子則晉地亦及河西矣秦伯取道伐晉有須涉河亦
有不須涉河第及韓已入晉竟晉侯乃自河東涉河
以禦秦師而車三壞及韓而與秦師遇也若必依杜

以涉河爲秦之涉河。自不得不移韓就東耳。至侯車
自當是晉侯乘車。唯屢壞。故改乘小駟。君車無故屢
壞。實晉侯喪師被獲之先徵。卜徒父早占得之。故以
晉之凶。測秦之吉。而其詞簡畧。秦伯未明其所以然。
故詰之。未必疑敗在己。卜徒父因更舉卦象申解之。
不敗何待。卽就車敗言。此時兩軍未交。傳紀三敗。亦
以實上文。及韓。所以起下文。並未先有戰事。正義殆
欠細察。而顧氏且以涉河侯車敗。亦傳之紀事。非卜
人之言。又背矣。

筮有占詞。卜亦有占詞。卜筮皆占測之名。對文則各有專屬。散言則通。卜徒父筮之。不必爲卜人而用筮也。今人但知周易。故以傳載占詞。非周易所有者。輒疑爲雜占。非蓋古連山歸藏中之言。春秋有其書。而後亡之矣。古人非專用周易也。

陰血周作。血本屬陰。特別言陰者。血以流通爲陽。凝滯卽爲陰也。

壬戌戰于韓原。此卽經之十一月壬戌。而上言九月。周之十一月。夏之九月也。晉事多用夏正。左傳載晉

事率採晉史爲之。經自遵周正書之。故日月每多差互。並非事在前。赴告在後。歷按經傳。如太子申生。經書殺在五年春。傳言十二月。夏之十二月。周之春也。弑奚齊。經書冬。傳言十月。夏之十月也。弑卓。經書十年春正月。傳言十一月。夏正之十一月也。獻公卒以九月葬。以十二月。至正月。卓已是踰年之君。故經從周月書君耳。而杜氏槩以從赴言之。

穆姬聞晉侯將至。以子女登臺而履薪。要君也。并挾子女。恐其要之不應也。履薪者。積薪于臺下。蓋作將

自焚之狀故使以喪服告也曰上天降災至唯君裁之四十七字絕精未必出後人手服杜之關注服杜良未見此文安知其所據本不有脫佚乎

瑕呂飴甥亦稱陰飴甥亦稱瑕甥蓋本氏呂而瑕與陰皆其食邑非姓也自杜注爲姓瑕呂于是通志氏族畧遂列之複姓中

爰田國語作輶田古爰袁輶字通也注疏訓爰爲易然如何易其疆畔之法未能言之州兵論者比諸內政邱甲之類傳兩於是乎作蓋言一時之權而遂爲

後日之制也。

史蘇占詞其繇曰下六句只當以本卦本爻言之下
歸昧之睽猶無相也方合變卦言注離爲中女震爲
長男故稱士女當是兌爲少女而誤作離中耳兌西
方之卦又謂口舌故曰西鄰曰言以兌金克震木故
曰西鄰責言不可償也秦西而晉東適應其象故不
吉本卦已不吉則視之卦爲救今歸妹而又變睽故
曰無相爲雷爲火時而爲雷時而爲火皆驚動不寧
之象歸妹三至五二至四互得坎離水克火睽又以

澤克火。嬴爲水位。姬秉火德。故爲嬴敗姬。宗邱者。韓本晉同姓國地也。離爲震妹。有姑象。睽本離上。自二至四。又互得離。離火爲震木子。有姪象。以互得之離。附正象之離。故曰從姑。自三至五。又互得坎。水克火。六爲水之成數。故六年。離上爻變。仍爲震。故歸其國。高粱語益奇。凡傳所載諸占詞。皆古人洞穿造化。原有前知。如見者。後世數家奇中。亦時得之。其理往往可解。不可解。于是少見則多怪。輒神之。仙之。而不知者。且以左氏爲非實。則過矣。

右戰于韓

左氏敘召陵事極澹蕩。城濮事極密麗。一不戰。一戰也。先紀謀元帥以見鄭重。次朔其前數年作用而歸之文教。末又結以德攻。予晉甚深。緣自宋襄以來。楚久侵凌諸夏。此一役實以挫楚之橫。伸中國之氣。最爲春秋一大舉。宜傳盛言之。亦體經特書晉侯與諸國異之微旨也。漢陽諸姬數語。特明揭楚罪。見此役之關係不小。當爲一篇主。而分曹衛田私許復曹衛。則以著晉文之誦。退三舍。名爲報楚。亦兵機也。所謂

怒我而怠寇者也。齊桓進師退師，何等大雅。晉文純乎陰深，唯左氏能曲盡之，斷非公穀家可並矣。

公羊稱子玉爲子玉得臣，蓋名與字兼舉，亦如左傳之百里孟明視，氏字名並舉也。此例甚多，何休不考，乃于下書殺得臣，經注云：「本當言子玉得臣，不氏者，貶誤以子玉爲得臣之氏。」疏并以疑傳非。

爲其所得者棺而出之，卽上門焉多死，爲曹人所得而尸諸城上者，今爲之棺斂而出，以還晉軍，冀以解釋也。注疏闕，林注補之。凡林氏補杜不及，亦有足正。

杜者甚好。但往往增減杜文。便爲已注。乃林氏之蔽。坊刻又時誤杜爲林。誤林爲杜。讀今之杜林合注者。不可不仍考注疏。相參正也。

魏準頗頡頏。曰。勞之不圖。報于何有。由二子之言。可見文公賞功。儘多不均。其待從亡諸臣薄矣。不獨一介之推也。英鷲之君。大都可共憂患。難與共安樂。而爲功臣者。又多恃其故舊。以致不保其終。漢唐事皆如此。

魏準傷于胷。公欲殺之。而愛其材。使問。且視之。病將

殺之林注謂責問其藝僨負器之罪且視其傷胷之病將俟其復命殺之如是則視之之字當作其而注疏釋文皆不言殺何必俟復命更衍說也觀下距躍三百曲踊三百明有示以非病意似上文當讀且視之斷句病一字句既問其罪兼視其傷病者甚詞甚則材已不可用殺之非所愛矣向來句讀未析耳下舍之仍以其材非以其有禮林注亦粗

踊躍皆跳也疏分距躍爲距地向前跳而越物過曲踊爲向上跳而折復下申注較明百猶勵也此非正

訓疏所謂不可爲六百跳也亦不知勵何所謂復訓
勵爲勉林注言凡三次皆勉勵爲之申疏加明釋文
三如字又息暫反百音陌竊謂二字皆只須如字讀
但義異耳百猶勵不如言猶迫古百迫聲同

王怒公說子玉不可公疑焉對照成章法

晉侯在外十九年矣卽昭十三年叔向曰文公生十
七年亡十九年者國語亦載僖負羈曰晉公子生十
七年而亡故杜據爲數且言至此四十矣以正史記
世家獻公卽位重耳年二十一奔狄年四十三反國

年六十二之誤也。何休則據史記。故謂文公時年已老。但太史公未見左傳。宜多不合。而國語則其憑以作史者。何復棄違。蓋并採雜記矣。如傳言是晉文以魯莊二十四年生。至二十八年。獻公使居蒲。纔五歲。蓋第假公子之重。以出鎮。固可不論年。亦必其頭角已有。爲驪姬所忌者。故與太子並出之。而夷吾爲其兄。姬言乃先重耳。意可見也。然國語則重耳是兄。原田每每。卽晦字。與畝通。不必言草。

監與蠱同。蠱。壞也。毛詩監。不堅固也。亦壞之意。杜云。

監聽也則隨文別訓耳

鞅鞅鞅鞅也故詩言鞅掌當云在前曰鞅

城濮衛地有莘之虛卽在其地與詩太姒母國之莘
在邠陽者別故注第云故國名以今輿地考之爲山
東東昌府莘縣元聖廟祀存焉所謂伊尹耕于有莘
之野者也其南去濮州卽古城濮爲近矣

王命尹氏及王子虎內史叔與父策命晉侯爲侯伯
大書特書比命齊桓加鄭重而詳殆以同姓有功異
之彤弓一彤矢百旅弓矢千云云上官用平禮故卽

用書文侯之命語不嫌其同也而說者不察又見文
諡適同遂以文侯之命卽襄王命重耳事矣

衛侯使元咺奉叔武以受盟則武之立公命也與公
子瑕迥殊一語釋經踐土之盟所以書衛子而後此
訟事亦于此見曲直經書盟實是蔡先衛而後此視
他述載書以爲衛先者特一時口給于道路之聞衆
人所未及考得以售其欺耳

右戰于城濮

邲泌水旁地也故何注言邲水傳文及河飲馬于河

胥濟者皆此水詩泌之洋洋蓋此水通陳鄭間而註家皆無以明之

以荀林父敵楚子不嫌以臣敵君而又先之穀梁疏載徐邈云先林父者內晉而外楚是也蓋由魯卿得會公侯爲內其國外諸夏之義公羊非是春秋雖進楚莊于內外夷夏之分自不可易也

夏六月晉師救鄭楚在鄭歷三月之久晉詎弗聞知及已克鄭退師而晉師始出緩不及事矣故經不書救鄭不成其爲救也

楚事于晉人語中敘晉事于楚人語中敘古文互換法讀者所當知

商農工賈不敗其業只是言楚兵所過無犯之意不必謂四者不與從軍疏舉齊語管子處士工商農者比較異同迂

兼弱攻昧取亂侮亡皆仲虺語文而此引之獨以取亂侮亡爲虺之言先以兼弱攻昧爲已言又以兼弱作釋詞正如文七年傳引夏書戒之用休云云而截其上下六府三事等語爲釋詞蓋古人引經多有裁

就不拘拘章句故也。好事者因以疑古文尙書之非，不足與語讀書矣。

古人引經，儘有誤引者。如遵養時晦，豈可作武王養紂解，而傳以耆昧釋之？鄭氏箋直作文王養是闇昧之君，以老其惡，未必不出于此。杜孔又因鄭而不知其非也。此正如咸邱蒙引普天之下四句詩，以証瞽叟事。孟子之引周餘黎民二句，亦必當時有作周無遺民解者，故孟子及之耳。

有律以如己也。明明有律在，而但以從己言，師心自

川也是律本臧而人否之使律不得盈其用故云故曰律否臧且律竭也易本于律字斷句此忽連下否臧爲文皆古人不拘章句處孔疏引易注而言否臧皆凶又似以否臧作無功有功用者然經文中間無轉語何由接否臧皆凶乎愚謂否字本可如字讀之言師出當以律否則雖臧亦凶如甘陳矯制之類亦疏所謂失令有功法所不赦者也若作否卦字則爲閉塞義以律乃臧之道也違塞其臧道則凶矣玩傳是讀否爲閉塞義故言天而注云天塞是也

臨乃十二月之卦。雖二陽浸長而上爲四陰所遏。未得遂其發生。有天塞之象。故云。不行之謂臨。星家有臨日爲上官出行之忌。蓋本此。

其君無日不討國人而訓之于民生之不易禍至之無日戒懼之不可以怠。二十九字一氣連下。作一句讀。在軍句無日不討軍實而申儆之于勝之不可保。紂之百克而卒無後。二十四字一句讀。此古文長句調法。兩之于卽下文之以也。注隔斷非。

盟有日矣。畧住。下突接楚致師者。此小頓大起法。

鞏朔韓穿監本誤作趙穿

自入手書桓子欲還以下一路寫衆人議論紛紛不定桓子並無一語衆人之言皆向元帥言也魏錡趙旃所請向元帥請也曰弗許曰許之曰皆命而往皆元帥爲之也而文不一出桓子若無元帥者想其慢無主張任衆人之此是彼非七上八落直至書敗乃出一語曰桓子不知所爲左公蓋深惡之故其傳神如是蓋此役固不當專咎彘子之強濟濟而討鄭之貳要楚之成戰與不戰權本在晉爲桓子者初本不

當遽還先自退氣也。旣不還，便當疾掩楚。旣不戰，便當靜待成。欲遣使，亦當使老成，勿使躁競。及楚師至，我果豫備整嚴，堅壁不動，以責楚之背，乘楚之敝，未見不可得志也。

屈蕩尸之，各本皆作尸。今之監本改作戶。作者證者，以尸爲誤案。尸是也。蓋尸者，不動之象。故杜訓爲止。古人多言尸，大都專主之義。此勸王之專主乎左也。下文逢大夫謂其二子曰：尸，女于是亦止之義。而作尸，杜不復注。林氏依止爲說，則此改尸妄矣。

大武有六成蓋一成為一詩故楚子得言其三其六武則其一也所言不能出今詩知二四五已久散佚如武宿夜是已其次與今不同未必是楚樂次第蓋或今詩篇第有舛耳

是役也鄭石制實入楚師乃追敘邲戰以前楚子圍鄭之因卽公羊所謂君之不令臣交易爲言是以使寡人得見君之玉面而微至于此者杜氏注闕疏載服虔云入楚師使楚師來入鄭是也非此疏幾似鄭石制于楚戰勝後更入楚師獻此謀矣而林氏不知

補

詩曰。亂離殍矣。爰其適歸。此爰字。毛鄭本同。朱子從家語作奚。蓋未察其字。古多用作疑詞。杜言爰於也。於何所歸乎。視舊注更明白。該得奚字。乃家語誤耳。予著詩細嘗及之。

右戰于邲

鞏之戰。左傳先于宣十七年。紀晉侯使卻克徵會于齊。齊侯帷婦人使觀之。卻子登。婦人笑于房。卻子怒。歸而請伐齊。十八年。公使如楚乞師。將以伐齊。楚師

不出杜注魯不事齊故懼而欲伐之至成二年春齊
侯伐我北鄙衛侯使孫良夫侵齊衛師敗績于是孫
桓子臧宣叔皆如晉乞師主卻獻子此其本事也時
魯初無聘齊事獨公羊以爲晉卻克與臧孫許同時
而聘于齊穀梁又爲季孫行父卻克衛孫良夫曹公
子手同時而聘于齊其並謂客或跋或眇蕭同姪子
闕而笑之左傳第言婦人笑于房而不著其所以笑
或二家近爲得實然亦參錯不齊甚多卽一蕭同叔
子左言齊君之母杜注同叔蕭君之字子女也公穀

則作蕭同姪子。公以爲齊君之母。穀以爲蕭同姪子之母。是齊君母。何注。蕭同。國名。姪子者。蕭同君姪姊之子。嫁于齊。生頃公。范注。蕭國也。同。姓也。姪子。字也。其母更嫁齊惠公。生頃公。宣十二年。楚滅蕭。故隨其母在齊。齊侯與姪子同母異父昆弟。穀初不言蕭同姪子。是男是女。如范。則且以爲男。春秋亦無國名蕭同者。與同姓者。而皆若言之鑿鑿。春秋之難讀如此。固當以左爲正。

魯四卿並將。從來所無。昭定之年。或書三卿。或書二

卿皆始于此杜氏闕解疏謂重兵故備書之非蓋魯政多門時雖季氏專國而諸卿亦各不相下故雜然並出經特備列以見其無主何休謂四大夫不舉重者惡內多虛國家悉出用兵亦一義也

公穀每言曹無大夫不知莊二十五年經明書曹殺其大夫而名偶闕至此又書曹公子首昭二十年書曹公孫會則非經之獨微曹矣告則書不告則不書貴則舉名氏微則稱人列國例一耳

卻克將中軍士燮佐上軍欒書將下軍晉之軍帥正

佐更替左氏皆班班可考他傳多六帥並敘唯此止
及其三蓋不並行也疏則因注更爲考按前後補貼
之極其細密此孔氏所以獨勝諸家讀者甚不可忽
此時趙朔已前死并可見史記載屠岸賈滅趙事尙
及趙朔之爲不實也

吾以分謗也見晉帥之和。不似邲戰氣象。故勝齊侯
驕故敗。

卻克解張邱緩三人事。卻克傷矢用正敘。二人則
就其口中自敘。此虛實之法。佐并轡。右援枹而鼓。蓋

張侯言訖卽代卻克鼓也。杜注闕。林注則以爲卻克事亦可存參。

韓厥俛定其右。正義曰言此者爲下丑父與公易位由厥之俯故不覺其易。皆孔氏審細處。

逢丑父。漢王之紀信也。一死一不死異耳。公羊則云。斬逢丑父。又其言丑父。面目與頃公相似。衣服與頃公相似。面目可似也。衣服則有等威。豈得君臣全無分別。此公羊之失俗者。何注援禮。皮弁以征。立解亦曲。至謂頃公特選丑父備急。欲以自代。益違事情。

丑父寢于輶中。兵車立乘以易位。恐人識破。非齊侯故。寢以隱之也。丑父與公本同車。易位未嘗易車。齊侯則別載。以免丑父自乘君車。安得更有棧車。爲丑父臥者乎。輶中自當是車中可臥處。而謂之輶。其義闕耳。注乃以爲士車。疏引周禮。士乘棧車。謂輶與棧同。林注直言臥車皆非。

韓厥執繫馬前。此時齊侯已載佐車免。不在車中矣。韓厥未及知。而向丑父致詞也。下文丑父使公下如華泉取飲。一段二十五字。本在驂絰于木而止時事。

非當韓厥前爲之。蓋驂絳時丑父卽已使公詐爲車
右下旣免而後丑父寢也。傳截在下者欲見韓厥初
不知齊侯已免及致詞訖始見是丑父而所獲獨丑
父耳。

齊侯免以下極寫齊侯武毅所謂善敗者不亂也。每
出斷句緊承上三出言不當別爲義。注非齊師以帥
退句蓋齊師之陷于晉陣不得出者齊侯求丑父不
得其被陷之師猶賴之以帥而退也。俄而入狄俄而
入衛皆見其衝突無前于齊侯爲勇不足恃于晉則

爲齊未可輕

辟司徒之妻也極惡戰事忽用一女子作收科

使齊之封內盡束其畝古者田有溝洫恒不利于戎
馬驅馳晉處齊西故欲令齊但耕作東方而廢其西
竟之田爲平壤以便于往來故下曰唯吾子戎車是
利無顧土宜注言循壘東行易范注亦云欲以利其
戎車於驅侵易也何注使耕者東西如晉地語頗含
混杜于上文亦云使董畝東西行傳只言東如何添
出西並言之蓋爲何所誤抑西字衍也

蕭同叔子非他寡君之母也彼隱言之我直叫破與
史記平原君曰夫魏齊者勝之友也在固不出也同
一語勢

趙汾曰傳以五伯對四王則爲通三代霸者言之是
也宋襄秦穆不成霸楚莊吞噬中國豈有所謂勤而
撫之以役王命之事按此則孟子三王五霸並言亦
可知也獨夏伯商伯事已遠故復獨舉齊桓耳
昔臧僇一視公羊請再請三穀更衍至四五不如此
之大方簡勁多矣做邑之幸當從劉炫做邑脫或有

幸戰勝解

戰以六月癸酉。盟以七月己酉。相距三十七日。則諸國之頓兵齊地久矣。齊非小弱。又詞直。不但魯衛未敢撓。晉亦只宜得手善罷也。公羊稱郤克眚。同魯衛之使。使其辭而爲之請。則魯衛之諫。皆晉假之。故經書及又公羊所謂及。猶汲汲也。我欲之者。見隱元年其分別經書及書暨之旨甚確。

若苟有以藉口。監本誤衍爲藉于口。藉乃假借之意。杜注薦也。雖正訓于此處稍覺皮厚。

輦去國五百里。爰婁去國五十里。穀梁子言之。杜注引之。疏不能詳其實。今考華不注山在濟南府歷城縣東北十餘里。其山皆石上銳。遙望如茵蔯之出水。轉側視之。兩勢相連。蒼翠欲滴。中有逢丑父祠。並祀先賢閔子。其東閔子墓存焉。山之下曰華泉。小清河過之。入于濼。西北雒山。志所稱雒華煙雨爲歷下勝景者也。西曰鞍山。高大以似馬鞍名。然則輦之爲地亦以山名歟。南爲歷山。俗名千佛山。元人碑記謂之舜耕山。古歷下亭因之。或以爲卽摩笄山者。妄也。山

東考古錄又辨齊乘以華不注亦名摩笄山之非就傳云六月壬申師至于摩笄之下癸酉師陳于鞏云逐之三周華不注則鞏在華不注之西而靡笄又在其西可知金史長清縣有劓笄山是也此論可爲明析由歷城東北行經華不注山宿章邱過鄒平長山諸邑而至青州臨淄古齊都適得古里五百之數矣

右戰于鞏

邲之戰桓子欲還是懦夫無能鄢陵之戰范文子欲反是忠臣深計城濮之戰晉勝而遂霸鄢陵之戰晉

勝而遂亂皆左公特地前後作比照處

公羊以經書朔不書晦故于僖十五年己卯晦成十六年甲午晦皆言冥言記異己卯晦連下震廟爲一事甲午晦則與下戰別爲二條意謂晦據魯書戰據晉楚書也此雖與左垂異于理非不可通可無庸深攻也唯其以僖十六年書是月爲晦日之稱則太僻耳若穀梁旣于己卯晦與公羊同釋爲冥至甲午晦云日事遇晦曰晦仍以晦朔言頗涉兩歧不及公羊例之畫一矣

此篇全以范文子不欲戰爲線索。寫衆人之氣方雄。一老之心獨苦。極如茶如火中。自有一種闇然神理。而行文亦借以爲擒縱曲直之法。

孟獻子曰。有勝矣。晉勝徵。只一敘。只片語。楚敗徵。用三敘。先在楚邊正敘。次在鄭邊旁敘。後在晉邊對敘。姚句耳與往。閒閒伏筆。唯杜能體之。

詳以事神。闕注。詳者。處事敬慎周至。無敢疎畧之意。以之事神。則爲多儀備物皆是。古字雖間與祥通。而義自別。正義乃以詳者祥也。事神得福。乃名爲祥。則

與詳以文義背矣。林注亦誤襲之。

邲之師。荀伯不復從此從事之從。謂敗後不復能從事于楚。以報楚言也。傳無林父奔走不復故道之事。注非。

甲午晦。楚晨壓晉軍而陳。凡左所書晦。皆晦日。與公羊殊。是月丙寅朔。則甲午乃二十九日小建。然安知非尙有一日。古行兵忌晦日。是出軍之始有之。若臨敵決戰。未必盡泥。獨晦冥忌耳。然亦有乘霧朝雪夜以掩敵者。楚之壓晉軍。未必不因是日晦冥爲出奇。

之計。傳所謂陳不違晦。在陳而囂。晦安得無囂乎。又昭二十四年。吳敗頓胡諸國之師于雞父。傳紀戊辰晦。經但書戊辰。無晦字。就左例。爲闕文。就公羊例。正可爲不書晦之証。吾故謂其未全非也。

注壓筭。其未備。筭同窄。乃迫逼之。使不得成列。所謂阻隘是也。鄭氏鵠羽詩箋。有根相迫。迨相致之語。迨卽此筭字。蓋古語有之。亦爲人姓。

皆曰國士在云云。自楚子登巢車下。一邊敘楚望晉軍。一邊敘晉望楚軍。兩段互換成章法。此皆曰之文。

承苗賁皇在晉侯之側亦以王卒告下已入晉邊自當晉軍中人語矣因晉軍有疑阻之意故苗賁皇復言于晉侯以解釋之公筮之亦以上皆曰故也杜注明確不刊服虔乃以皆曰爲伯州犁苗賁皇皆言如此而國士爲總晉楚之士殊率混兩邊人言安得適如一口而傳總約之乎疏非之宜

欒范以其族夾公行是時大夫多有私甲故傳言族注言二族強行音杭公左右親軍也釋文闕音

國有大任元帥有元帥之大任戎右有戎右之大任

非一人所得專也。

癸巳乃甲午前一日。忽挿在後。與昭十三年平邱之盟。先書甲戌。後言癸酉。皆古史倒敘間敘之法。以斷爲聯也。在尙書唯武成有之。而諸家誤以武成有錯簡。遂多異說。蓋未參之左氏。顧寧人能知左傳之妙。以讀史亦尙未悟尙書之妙。以讀經。

卻至三遇楚子之卒。當是王未傷日前事。晉韓厥從鄭伯。是楚鄭已敗事。

敢告不寧君命之辱。疏連讀爲一句。是。

韓厥曰。不可以再辱國君。鞏之戰。厥雖從齊侯所獲。乃逢丑父。未爲辱國君也。注似稍迂。明韓友一曰。中
日已辱楚王。故不欲復及鄭伯。且見呂錡傷楚王而死。厥亦有畏故耳。此解頗近之。

補敘子重左軍也。獨不及令尹子辛右軍一語。蓋文
有詳畧。此役晉分良以牽制楚左右軍。而三軍萃于
王卒。王傷卒奔。故經書楚子敗績。其左右固猶整。故
借子重事以見不書楚師之意。猶邲之戰。晉上軍不
敗。是以經書戰也。

不亦識乎。識音志。釋文闕。此只稱其言不遺忘。猶今語云好記性。林云識於禮。贅。

見星未已。上已書晉師止。則未已者。楚師之未已也。亦見楚之強。雖敗未肯爲晉弱。遂生下子反命軍吏。苗賁皇狗曰。兩波未戰前云不欲戰。旣戰後云明日復戰。在作者第因事成文。而文已極頓挫之神。不盡之勢。

以文子起。以文子結。諸臣不佞注。佞才也。蓋當時之人。固以佞爲才也。

右戰于鄢陵

胡傳舉正序

予嘗爲春秋胡傳舉正六卷序曰佑自十二歲受春秋塾師卽以胡氏傳先授讀之曰令甲之所主也後二年從王素心夫子遊讀左傳聽講大義而惑焉時以質于先生之前先生更命取公穀二傳讀之參其離合始知胡氏所主爲傳者大都出于公穀什四五而左氏裁二三自出新意復二三焉其所主之經文則左氏十之七而亦時依公穀本雜乎其中案春秋三家鼎峙非但傳說各不相師經文亦不相襲故

異同日滋然既單行別出非可苟合代遠言湮益難
確斷昔之學者咸奉左爲大宗自當以其經本爲正
而公穀有可採存則附見其下以資參佐可矣胡氏
必欲併而一之忽彼忽此不南不北則適成爲胡氏
之春秋而已此皆宋儒之勇于作古乃其蔽之大者
三傳注疏杜孔最優范次之何最劣胡氏兼綜立說
就其取舍何嘗無得于扶世立教之義良亦不肯爲
隨聲附影之流蓋本以進講而專在格君特不免信
心而過于求聖至稱聖人有改制行權之事顯乖爲

下不倍之道。周身之防。但不至爲何休之黜。周王魯而已。是以朱子譏之。後儒議之。幾同集矢。顧自元明尊爲功令。據以取士。久而未改。朱高宗時。胡傳雖經實用三傳。禮部韻畧後附條例。可攷也。元史選舉載延佑新制。始以春秋用胡。安國傳定爲功令。汪克寬春秋纂疏。全以胡爲主。至明雖以經文命題。實以傳語立義。元人合題之制。尙考經文之異同。明則割傳中一字一句。牽連無理。我朝彙纂于胡氏。不情失當之處。始多所駁正。乾隆初年。又刊除鄉會試合題之例焉。然俗學言經旨。終未敢出胡範圍。持衡者不免兩端。甚至村塾名爲誦五經。而止知胡氏春秋。不知左傳者。經文若其溫故知新。各抒所見。要亦無嫌亦多剛併者。異同每積此心。以讀三傳注疏。至十數復。而後敢涉。

筆其間。齒行老矣。學無已時。惟筌蹄之未忘。冀飛蟲其亦獲。因復取先授之胡氏傳。加點勘焉。既竟。乃別錄之名。倣唐郭氏易例。曰舉正。汲古閣十三經注疏刊本。世所稱善。而舛誤時多。此胡傳音註。在傳下者。皆毛氏集諸儒爲之。其經下者。卽所題林堯叟括例始末者也。林氏貫穿經傳。雖非盡善。發明多勝于胡。附載至當。然亦時雜以他注之文。非盡林氏之舊。又自左傳有杜林合注之本行。坊刻時時誤杜爲林。誤林爲杜。毛氏因之。遂以轉易失實。今雖未暇悉校。稍

正其文字約十之四亦各隨案附識焉此乾隆四十五年庚子夏事也越歲癸丑實維
聖天子壽考
作人之五十八年益務昌明經學
特允廷臣之

議鄉會試春秋文依左氏經傳本事命題兼參公穀之說罷胡安國傳不用五百年來支離牽勉之習爲之一清士林莫不稱快則是六卷之私抑亦可以無庸矣惟其三家經文異同攙雜至今坊俗流傳未有定本蓋亦卽事有漸不能無待者謹書其畧而附存之于此

讀春秋存稿卷四終